

Protocol no. 15
Sezzüda da lündeschdi, 16 avrigl 2012, 9.00 – 12.00

Preschaints: Albert Mayer, Andri Poo, Men Caviezel, Dumeng Jann, Marianne Werro-Lehmann e Claudia Luppi (protocol), Jon-Curdin Felix per las tractandas 2-7

Protocol

Il protocol no. 14 da la sezzüda da marcurdi, 11 avrigl 2012 vain approvà.

90 021 FABRICA
Dora Erny – Serrar lobgia existenta sco veranda, Archas

La partuna da fabrica fa la dumonda da pudair serrar la lobgia vers ost existenta cun paraids e tet e far landroura üna veranda. La publicaziun ha gnü lö dals 22 marz fin als 10 avrigl 2012. Il Cussagl cumünal decida da conceder il permiss tenor ils plans inoltrats. La taxa da trattamaint importa fr. 100.--.

91 021 FABRICA
Cumün da Sent – Sanaziun chasa da scoula, 1. etappa, Contuorns, Saranschasch

Tenor il proget da l'architecta esa previs da separar la piazza da scoula pro la 1. e 2. classa cun üna trapartida da la scarpada ed il mür vers la via. Implü esa previs da levar sülla piazza da scoula d'immez ils s-chaluns e da tils rimplazzar cun üna paraid da palisadas per rampignar e cun nischas per sezzer giò. La publicaziun ha gnü lö dals 22 marz fin als 10 avrigl 2012. Il Cussagl cumünal conceda il permiss pel proget dal cumün tenor ils plans inoltrats. La taxa da trattamaint importa fr. 100.--.

92 021 FABRICA
Men Zanetti- Suottet per giallinas, Tuols

Il patrun da fabrica vuless eriger ün ulteriur suottet provisoric per las giallinas e quai vers süd da la parcella. Il Cussagl cumünal decida da conceder il permiss cun seguaintas cundiziuns: Il suottet sto gnir levà pels 31 december 2014 cun tuot ils ulteriurs fabricats chi han be ün permiss provisoric, opür chi sto davò quel termin gnir inoltrada üna dumonda da fabrica nouva per quels fabricats. Il permiss vain implü concess be resalv cha'l partun dal terrain detta l'acconsentimaint pel fabricat in mettend la suottascripziun cun data süls plans.

93 810 ADMINISTRAZIUN FORESTALA
Don via Surains – proget da god

Per quista tractanda ha il schef da vias champestras invidà al manader tecnic Jon-Curdin Felix chi orientescha chi's haja constatà pro la via chi maina sün Surains considerabels dons

e quai pro'l mür da sustegn davò la storta da Val Güstina, sco eir pro la curuna dal mür avant co rivar pro la punt sülla posa da las chavras e pro la costa sur la storta ingiò cha la senda dal siglioc riva aint illa via da Vastur. Implü es eir il stadi da la via in general vaira nosch. Tenor ils sclerimaints fats dal manader tecnic pro'l uffizi da god esa pussibel da dar aint ün proget da SIE pels ons 2013 / 2014 per üna sanaziun dals lös pertocs. Our da motivs da sgürezza füssa per intant da tour masüras provisoricas. Il Cussagl cumünal incumbenzescha al manader tecnic ed al schef da vias champestras da tour sü contact cun Fadri Guler da l'uffizi da god per as laschar cussgliar a regard las masüras provosoricas adattadas.

94 70 PROVEDIMAINT D'AUA
Squitsch illas lingias dal provedimaint d'aua - Calculaziun da rait

Pel mantegnimaint da las lingias dal provedimaint d'aua füssa bun d'avair ün manual cullas calculaziuns dal squitsch da l'aua illas lingias per tuot il territori da Sent. Quist manual füss implü eir d'avantag in vista a la zona da fabrica per indigens e per eventualas surfabricaziuns novas illa zona da fabrica dal cumün. Il büro d'indschegners Caprez ha inotrà ün'offerta per quista lavur chi as referischa sün datas da basa elavuradas da lur büro. Sainza entrar sün l'offerta dal büro Caprez incumbenzescha il Cussagl cumünal al schef d'infrastructura da trar aint amo üna o duos ulteriuras.

95 700.315.02 Mantegnimaint dal provedimaint d'aua
Rimplazzamaint da la pompa dal reservuar

Per quista tractanda ha il schef d'infrastructura invidà il manader tecnic Jon-Curdin Felix chi spiega cha la pompa chi pompa l'aua dal reservuar suot sün quel sura saja defetta da maniera ch'ella nu po plü gnir reparada. Quista pompa es installada per cha la part sura dal cumün (zona da pressiuon ota) survegna eir l'aua da baiver da la lingia d'Uina. In vista chi's ha fat d'ürant blers ons bunas experienzas culla firma furnitura da la pompa, ha il manader tecnic tut aint offerta per üna pompa nouva. Ils cuosts per la pompa s'amuntan tenor offerta sün fr. 1'842.70. Per müdar oura la pompa vegnan calculats amo cuosts da fr. 600.--. Il Cussagl cumünal decida da dar liber ün credit da fr. 2'500.-- pel rimplazzamaint da la pompa.

96 83 TURISSEM
Sistem d'innaiver – Concept per montar e demontar las lantschas

Pel sistem d'innaiver han las Pendicularas Motta Naluns (PMN) sül territori da Ftan, Scuol e Sent ün grond quantum da lantschas. Sur stà vegnan quellas allontanadas per gronda part tenor üna tscherta pratica da las PMN. Ultimamaing ha gnü lö üna sezzüda tanter las PMN, l'organisaziun turistica TESSVM ed ils cumüns pertocs concernent il tema da la montascha e la demontascha da las lantschas d'utuon e la prümavaira. Il manader tecnic Jon-Curdin Felix ha tut part a la sezzüda e rapportescha las differentas vistas dal problem tuot tenor gruppa d'interess. Ils argumaints van dals cuosts per la montascha e la demontascha fin pro'l disturbi dal purtret da la cuntrada. Conguals cun otras destinazuns muossan andamaints fich differentes, da la demontescha totala fin pro la montascha fixa per tuot on. Il Cussagl cumünal es da l'avis chi's stopcha chattar üna via ch'id es pratichabla per las PMN sainza cha l'aspet da la cuntrada vegna disturbà massa ferm. Il Cussagl cumünal decida perquai da giavüschar da las PMN l'inoltraziun d'ün concept chi indichescha a man d'ün plan, qualas lantschas chi vegnan demontadas sur stà e qualas chi restessan montadas. Quist concept stuvev gnir examinà e fat bun dal Cussagl cumünal. Per la stà 2012 dessa gnir pratichà amo sco fin uossa.

97 720

ALLONTANAMAIN D'IMMUNDIZCHAS

Deponia Curtin – Installaziun d'ün ulteriur cuntgnaröl suotterran

Las experienzas fattas i'ls ultims mais demuossan cha la deponia a Curtin vain frequentada bainquant daplü co calculà uschè chi fa dabsögn d'installar amo ün ulteriur cuntgnaröl suotterran. Quist intent füss pussibel sainza stuvair levar üna piazza da parcar. Ils cuosts tenors las offertas s'amuntan sün fr. 11'700.--. I füss pussibel da preverer quist'investiziun pel preventiv 2013, però lura nu füss scholt il problem per las stagiun da stà 2012 ed impustüt na per quella d'inviern 2012/2013. Il Cussagl cumünal preferischa d'avair uorden pro las deponias e da schoglier il problem subit uschè ch'el conceda ün credit da fr. 11'700.-- per l'installaziun d'ün ulteriur cuntgnaröl chi füss in funcziun fingià per la stagiun da stà 2012. Implü gnarà la populaziun a temp ütil giavüscheda tras "mas-chalch" da far adöver scha ma pussibel da las deponias da Tuols e Davo Stron per schligerir la deponia da Curtin frequentada suvent da noss giasts.

98 801

MELDRAMAIN DA PASCULAZIUN E FUOND

Contrat da barat – Parcella Zoppanaina, L. Vital

Il schef da god e paurarua orientescha cha'l sfrüader da la parcella da Lina Vital haja fat cun l'acconsentimaint dals possessurs da la parcella la dumonda da pudair müdar il lö da la s-chamgiaduora pro'l prà a Zoppanaina e da tilla metter al lö da la chombra d'aua per la sauaziun chi as rechatta eir pro quel prà. Per quist müdamaint esa necessari da far ün contrat da barat da terrain e d'inscriber quist barat i'l cudesch fundiari. Il Cussagl cumünal decida d'aderir al giavüscheda dal sfrüader e dals possessurs da la parcella. Il barat da terrain gnarà inscrit prossmamaing i'l cudesch fundiari.

99 860

PROVEDIMAIN ELECTRIC

„Rait Engiadina“ – Decisiun a man da la radunanza

Sco publichà fingià i'l protocol no. 14, tractanda 85, ha il cumün da Sent la pussibilità d'entrar illa società da dret public "Rait Engiadina" (RE) cul böt d'avair structuras plü professunalas ed efficiantas pel provedimaint d'electricità. Davò cha'l schef d'infrastructura ha scleri eir amo in che möd e cun che funcziun cha la firma Energia Engiadina vain integrada illa società RE decida il Cussagl cumünal da suottametter la fatschenda a la radunanza d'orientaziun dals 1. mai 2012 culla proposta da vulair suottametter l'entrada illa società RE dal cumün da Sent a la cumünanza d'urna dals 17 gün 2012.

100

ORIENTAZIUNS

Innaiver – Etappa Niruns

Il capo orientescha cha la Pro Natura haja inoltrà üna posiziun pro l'uffizi per il svilup dal territori Grischun (ARE) a regard l'etappa da l'indiriz d'innaiver da Niruns e cha las Pendicularas Motta Naluns hajan l'intenziun da tour posiziun lasupra.

Plan directiv regional

Il capo orientescha cha las Pendicularas Motta Naluns hajan inoltrà pro la PEB la proposta per ün ingrandimaint dal territori da skis in direcziun Plan Tiral.

Uors in Engiadina Bassa

Il capo orientescha cha'ls cumüns d'Engiadina Bassa sajan gnüts avisats davart l'uffizi da chatscha e da pescha da dar inavant a lur populaziun las directivas da l'uffizi a regard las reglas da cumport in connex cun l'uors. Üna comunicaziun in quist connex es prevista pel prossem maschalch.

L'actuara: